

Morning Dogri (NSD) National News Bulletin 07-10-2024

आकाशवाणी

खबरां नाट्यपाल सिंह कोला।

1. प्रधानमंत्री नरेन्द्र मोदी होर अज्ज मालदीप दे राष्ट्रपति डॉ. मोहम्मद मुइजू हुंदे कन्नै गल्लबात करगंन। दवै मुल्खें बश्कार केई समझौते उप्पर दस्तखत होने दी बी मेद ऐ।
2. केन्द्री गृहमंत्री अमित शाह होर खब्बै पक्खी अत्तबाद थमां प्रभावत राज्यें दे मुखमंत्रिएं कन्नै बैठक दी अध्यक्षता करगंन।
3. हरयाणा ते जम्मू-कश्मीर च होए दे विधानसभा चुनांए गितै वोटें दी गिनतरी लेई सब्बै पुख्ता इंतजाम करी लैते गए न।
4. भरुं 7 अक्टूबर गी हम्मास आसेया ईजरायल उप्पर कीते गेदे मारु हमले दे इक्क बरा होई जाने पर ईजरायल च बड़ी मती चौकसी आहला हाई एलर्ट जारी कीता गया ऐ।
5. त्रै टी-20 मैचें दी क्रिकेट श्रृंखला दे पैहले मैच च कल भारत नै ग्वालियर च बंगलादेश गी 7एं विकटें कन्नै हराई दित्ता।

<><><><><><>

PM-Maldives

प्रधानमंत्री नरेन्द्र मोदी होर अज्ज मालदीप दे राष्ट्रपति डॉ. मोहम्मद मुइजू हुंदे कन्नै नमीं दिल्ली च दपक्खी, क्षेत्रीय ते अंतर्राष्ट्रीय मुद्दें उप्पर गल्लबात करगंन। मीटिंग दरान दवै मुल्खें बश्कार केई समझौते उप्पर दस्तखत होने दी बी मेद ऐ। मालदीप दे राष्ट्रपति होरें राजघाट जाइयै महात्मा गांधी होरें गी श्रद्धांजलि बी अर्पित करगंन। वार्ता शा पैहले डॉ. मुइजू हुंदा राष्ट्रपति भवन च रस्मी सुआगत कीता जाग। डॉ. मुइजू होर राष्ट्रपति द्रौपदी मुर्मू , उपराष्ट्रपति जगदीप धनखड़ हुंदे कन्नै बी मलाटी करगंन। मालदीप दे राष्ट्रपति होर भारत दी 5 रोजा यात्रा उप्पर कल नमीं दिल्ली पुज्जे हे। एह्दे शा पैहले इस बरे जून म्हीने च ओह नरेन्द्र मोदी हुंदे प्रधानमंत्री दे औहदे दी सगंध चुक्कने आले समारोह च शामिल होने लेई भारत आए हे। हिंद महासागर क्षेत्र च भारत दा मुख गोआंढी होने दे कन्नो कन्नी

मादद्वीप प्रधानमंत्री मोदी हुंदे मिशन सागर ते भारत दे अपने गोआंढ गी तरजीह देने आली नीति दे नजरियै च मुख थाहर रखदा ऐ।

<><><><><><>

PM-Life

प्रधानमंत्री नरेन्द्र मोदी होरें सार्वजनिक औहदे पर अज्ज 23 ब'रे पूरी करी लैते न। 2001 च अज्जै दे रोज मोदी होर पैहली बारी गुजरात दे मुखमंत्री बने हे। केन्द्र च एनडीए सरकार आस्सेआ शुरू कीते गेदे केई कल्याणकारी कार्यक्रम गुजरात दे मुखमंत्री दे रूपै च नरेन्द्र मोदी हुंदी पैहलकदमिएं थमां प्रेरत न।

<><><><><><>

Amit Shah

केन्द्री गृहमंत्री अमित शाह होर अज्ज नमीं दिल्ली च सब्बै पक्खी अत्तबाद थमां प्रभावत राज्यें दे मुखमंत्रिएं कन्नै बैठक दी अध्यक्षता करगन। इस बैठक च आंध्रप्रदेश, बिहार, छत्तीसगढ़, झारखंड, तेलंगाना, ओडिशा, महाराष्ट्र ते मध्यप्रदेश दे मुखमंत्री हिस्सा लैंगन। एहदे इलावा प्रभावत राज्यें गी मदाद पजाने आले 5 केन्द्री मंत्री, राश्ट्रीय सुरक्षा सलाहका, केन्द्री सशस्त्र पुलस बल दे वरिष्ठ सलाहकार बी इस बैठक च शामिल होंगन। इक ब्यानै च गृहमंत्री होरें आखेआ ऐ जे केन्द्र सरकार मार्च 2026 तोड़ी सब्बै पक्खी अत्तवाद गी पूरी चाल्ली खत्म करने लेई वचनबद्ध ऐ। मंत्रालय नै आखेआ जे नरेन्द्र मोदी सरकार दी नीति कारणनक्सलवादी हिंसा च 72 फीसदी कमी आई कीती गेई ऐ जदके 2020 दी तुलना च 2023 च 86 फीसदी घट्ट मोता होइयां न। 2024 च अजें तोड़ी सुरक्षाबलें 202 नक्सलवादिएं गी मारी मकाया ऐ जदके 723 नक्सलवादिएं आत्म समर्पण कीता ऐ ते 912 नक्सलवादिएं गी गिरफ्तार कीता गेआ ऐ । मंत्रालय नै आखेआ जे सरकार नै प्रभावत राज्यें दे दूर दरेड़े इलाकें च शिड़कें ते मोआइल संपर्कें दे कन्नै केई विकास परियोजला शुरू कीतियां न। मंत्रालय नै आखेआ जे सरकार नै प्रभावत इलाकें च 14 ज्हार किलोमीटर शिड़कां बनाइयां ते 6 ज्हार मोबाइल टॉवर लाए न।

<><><><><><>

JK-Counting

कल 8 अक्टूबर गी हरियाणा ते जम्मू कश्मीर विधानसभा लेई होए दे चुनां दे वोटें दी गिनतरी होग। जम्मू कश्मीर दे असेंबली चुनाएं च अपनी किस्मत अजमा करदे 873 मेदवारें दे चुनां भागें दा फैसला कल हरियाणा वोटरें दी गिनतरी दे कन्नै 20 मतदान केन्द्रें च वोटें दी गिनतरी कन्नै होग। केन्द्र शासित प्रदेश च मतगणना लेई व्यापक इंतजाम कीते गेदे न। वोटें दी गिनतरी दे बाद जम्मू कश्मीर च नमीं सरकार बनाने दी बत्त पदरी होई जाग ते 2019 च दफा 370 ते 35-ए हटाए जाने दे बाद लोकें आस्सेआ चुनी गेदी सरकार बनोग। हाल च गै होए दे विधानसभा चुनाएं च जम्मू कश्मीर दे लोकें बधी-चढ़ियै हिस्सा लैता ते लोकतंत्र दे पर्व दा हिस्सा बने। तोआई जम्मू कश्मीर दे मुख् चुनां अधिकारी पी.के.पोले होरें गलाया ऐ जे वोटरें दी गिनतरी दा कम्म रमानदारी कन्नै तोड़ चाढ़ने लेई सब्बै इंतजाम करी लैते गेदे न।

<><><><><><>

Harayana-Counting

तोआई हरियाणा च बी कल होने आली वोटें दी गिनतरी लेई सब्बै इंतजाम करी लैते गेदे न। उत्थूं दे मुख् चुनां अधिकारी पंकज अग्रवाल होरें दस्सेआ ऐ जे सब्बने 22एं जिला मुख्यालये च मतगणना केन्द्र बनाए गेदे न। उनें दस्सेआ जे कालका ते पंचकूला विधानसभा सीटें लेई पाए गेदे वोटें दी गिनतरी पंचकूला च होग जिसलै जे नारायणगढ़, अम्बाला छावनी, अम्बाला शैहर ते मुल्लना विधानसभा सीटें दे वोट अम्बाला च बनाए गेदे 4 मतगणना केन्द्रें पर गिने जांगन। अग्रवाल होरें दस्सेआ जे सब्बै स्ट्रांग रूम सीसीटीवी कैमरें दी निगरानी हेठ न ते उंदी हिफाजत लेई त्रऊं घेरें दी सुरक्षा बवस्था कीती गेदी ऐ।

<><><><><><>

Israel-Hammas

पिछले ब'रे 7 अक्टूबर गी होए दे हमास दे आतंकी हमले दी पैहली बरसी दे मौके पर इजराइल च हाई अलर्ट जारी कीता गेआ ऐ। इजराइली रक्षा बलें गजा थमां लम्मे छिंडे पर मार करने आले राकेट हमले ते कुसै होर चाल्ली हमले होई सकने दी शेंका जताई ऐ। इजराइल नै गजा कोल होर मते सैनिक तैनात कीते न। इस्सै दरान इक बंदूकधारा आस्सेआ इजराइल दे बीरशेबा च इक बस अड्डे पर हमले च इक महिला दी मौत होई गई ऐ ते 1. दुए घायल होई गे न। पुलस नै इसी आतंकी हमला दस्सेआ ते जवाबी कारवाई च हमलावर

गी मारी दित्ता गेआ ऐ। इस्सै दरान निछले हफ्ते दे ईरानी मिसाइल हमले पर जवाबी कारवाई दी इजराइल दी धमकी दे बाद ईरान नै अज्ज बडलै तगर अपनयां सब्बे ब्हाई डोआरियां रद्द करी दित्ती दियां न।

<><><><><><>

Pakistan Blast

पाकिस्तान च कराची ब्हाई अड्डे पर कल रातीं होए दे इक धमाके च इक आदमी दी मौत होई गई ते 10 दुएं दे घायल होने दी खबर ऐ। बक्खवादी आतंकी संगठन बलूच लिबरेशन आर्मी नै इस हमले दी जिम्मेदारी लैती ऐ। संगठन दा आखना ऐ जे उन्नै चीनी इंजिनियरें ते निवेशकें दे इक उच्ची सतह दे काफले गी नशाना बनाइयै एह हमला कीता ऐ। अजें तोड़ी छड़े इक आदमी दी मौत दी तस्दीक होई ऐ जिसलै जे घायलें दा जिन्ना पोस्ट ग्रैजुएट मैडिकल कालेज च इलाज चलै करदा ऐ।

<><><><><><>

Men-T-20

ग्वालियर च त्रै टी-20 मैचें दी क्रिकेट श्रृंखला दे पैहले मैच च कल भारत नै बंग्लादेश गी 7एं विकटें कन्नै हराई दित्ता। भारत नै टॉस जित्तिायै पैहले गेंदबाजी करने दा फैसला लैता। बंग्लादेश दी टीम 19 ओवर ते 5 गेंदे खेडिड्यै कुल 127 रंज बनाई सकी जेहदे परते च भारत नै 11 ओवर ते 5 गेंदें च शड़ियां 3 विकटां मोआइयै 128 रंज बनाए ते मैच जित्ती लैता।

<><><><><><>

Women T-20 World Cup

दुबई च महिला टी-20 क्रिकेट विश्व कप च कल भारत नै पाकिस्तान गी 6 विकटें कन्नै हराई दित्ता। टॉस जित्तिायै पैहले बल्लेबाजी करदे होई पाकिस्तानी टीम नै 20एं ओवरें च 8एं विकटें दे नुक्सान पर 105 रंज बनाए। जेहदे परते च भारत नै 18 ओवरें दे 5 गेंदे च 4 विकटां मोआइयै 108 रंज बनाए ते मैच जित्ती लैता।



RBI

भारतीय रिजर्व बैंक की मुद्रा नीति सरबन्धी कमेटी की त्रुं दिनें की बैठक अज्ज शुरू होग। माहिरें मूजब रिजर्व बैंक दिए प्रमुख सूद दरें च कोई बदलाव नेई होने की संभावना नेई ऐ। जिसलै दे खाने पीने आलियें चीजें की मैंहगाई ते आर्थिक विकास दर रिस्क रिजर्व बैंक लेई प्रमुख चिंता दे विषय न जिंदे बारे इस बैठक च सोच बचार कीता जाई सकदा ऐ। सरकार नै रिजर्व बैंक की उपभोक्ता मुल्ल सूचकांक पर आधारित परचून मैंहगाई की 4 प्रतिशत कोला घट्ट बनाई सब्बने दा जिम्मा सौंपेआ ऐ। इस म्हीने की शुरूआत च कमेटी दा नमें सिरेया गठन कीता गेआ हा ते एहदे च त्रै नमें मिंबर शामिल कीते गे हे। कमेटी दे अध्यक्ष ते आरबीआई दे गवर्नर शक्ति कांत दास होर बुधवारें बैठक दे खत्म होने दे बाद एहदे च लैते गेदे फैसलें दे बारे च जानकारी देंगन।



SBM Akhnoor

भारत सरकार दे “स्वच्छ भारत मिशन” तालमेल बनाइयै भारतीय फौज नै ज्योड़ियां च इक बड्डे जागरूकता अभियान दे। आयोजन कीता तां जे मकामी लोकें की साफ सफाई, स्वच्छता ते स्थाई कचरे दे प्रबंधन दे महत्व बारे जागरूक कीता जाई सकै। भारतीय फौज आस्सेआ आयोजित कीते गेदे इस कार्यक्रम च मकामी लोकें बधी-चढ़ियै हिस्सा लैता।



Swachhta Hi Seva

सरकारी डिग्री कालेज मड़ दे विद्यार्थियें ते उत्थूं दे अमले नै “स्वभाव स्वच्छता संस्कार स्वच्छता” विशे दे तैहत कालेज दे प्रिंसिपल प्रोफेसर डॉ. राकेश कुमार कौल हुंदे मार्गदर्शन हेठ मतिमा गांधी हुंदी जयंति पर 15 दिनें दा स्वच्छता की सेवा कार्यक्रम दा आयोजन कीता। 15 दिनें दे इस कार्यक्रम की शुरूआत जागरूकता रैली दे तोरा पर शुरू होई जेहड़ी जीडीसी मड़ थमां शुरू होई ते दत्तेयाल पुज्जी जित्थें एनएसएस दे सवयंसेवी समूह दे विद्यार्थियें ते कालेज दे अमले नै हिस्सा लैता। स्वच्छता अभियान दे चलदे विद्यार्थियें अध्यापकें दे कालेज

दे प्रिंसिपल होरें सगंध बी लैती। इस अभियान तैहत्त गलिएं, नैहरें, मैदानें ते कालेज दे आले दुआले दी साफ सफाई कीती गई।

<><><><><><>

Voting Turnout

जम्मू कश्मीर विधानसभा चुनावों के त्रिए गेड़ च महिला मतदाताएं इक बारी फही पुरुष मतदाताएं गी पिच्छे छोड़ी दित्ता ऐ। मंगलवारें पैहली अक्तूबर गी त्रिए गेड़ तैहत्त होए दे मतदान च नतर अशारिया 6-9 फीसद मतदान दर्ज कीता गेआ। चुनावों आयोग आस्सेआ जारी आंकड़े मताबक जम्मू कश्मीर विधानसभा के त्रिए गेड़ च 70.2 प्रतिशत महिला मतदाताएं अपने वोट पाए ते नतर अशारिया 3-7 प्रतिशत पुरुष मतदाताएं वोट पाने दे अपने अधिकार दा इस्तेमाल कीता। त्रिए गेड़ च सब्बने थमां मता मतदान मढ़ विधानसभा हल्के च दर्ज कीता गेआ जित्थें तकरीबन 81 अशारिया 4-7 फीसद मतदान दर्ज कीता गेआ, एह्दे मगरा छम्ब च 80.34 प्रतिशत मतदान होआ। 40 विधानसभा हल्कें चा सब्बने शा घट्ट मतदान सोपोर निर्वाचन हल्के जेह्दे च 45.32 प्रतिशत मतदान दर्ज कीता गेआ, एह्दे मगरा बारामुला च 53.90 प्रतिशत मतदान दर्ज कीता गेआ ऐ। जम्मू कश्मीर च 18 सितम्बर 2024 गी शुरू होए दे त्रै गेड़ें दे विधानसभा चुनावों पैहली अक्तूबर गी सम्पन्न होए। वोटें दी गिनतरी 8 अक्तूबर 2024 गी होग।

<><><><><><>

Nomination MLA

जम्मू कश्मीर च 5 नामांकित विधायक सरकार बनाने च अहम भूमिका नभांगन। 10 बरे दे वक्फे मगरा जम्मू कश्मीर च चुनी गेदी सरकार बनोग। एह् एमएलए कश्मीरी विस्थापिते ते पीओजेके दा प्रतिनिधित्व करगंन। इनेंगी होरने विधायकें आला लेखा गै हक्क हासल होंगन। विधानसभा च नामजद 5 विधायक होंगन। कुल 5 एमएलसी चा 2 कश्मीरी

विस्थापित जिन्दे च इक मिहला ते इक पुरुष होग ते इक पीओजेके दी नुमायन्दगी करौंग। विधानसभा च हुन कुल 95 विधायक होंगन, जे हुन सरकार बनाने आले 48 यानि 50 फीसद दा आंकड़ा हासल करना जरूरी ऐ। उपराज्यपाल मनोज सिन्हा होर गृहमंत्रालय दी सलाह पर 5 विधायकें गी नामजद करगंन। जम्मू कश्मीर पुर्नगठन अधिनियम 2019 च 26 जुलाई 2023 च संशोधन करियै एह प्रावधान आन्नेआ गेआ हा।

<><><><><><>

Congress MLA

कांग्रेस नै बीजेपी दी इस गें पर सख्त ऐतराज जताया ऐ जे जम्मू कश्मीर च सरकार बनाने दी प्रक्रिया थमां पैहले उपराज्यपाल हुंदे आस्सेआ 5एं एमएलए गी विधानसभा च नामजद कीता जाग। कांग्रेस नै इस चाल्ली दे कुसै बी गेंह गी गैर लोकतांत्रिक ते लोकें दे जनादेश दे खलाफ आखेआ ऐ। उनें आखेआ ऐ जे उपराज्यपाल होरें गी इस चाल्ली दी कोई बी गें नेई पुट्टनी लोडचदी। इस सरबंधै च मीडिया दी रिपोर्ट उपपर सख्त नुक्ताचीनी करदे होई जेकेपीसीसी नै इस चाल्ली दी कारवाई गी गैर लोकतांत्रिक करार दित्ता ऐ। जेकेपीसीसी नै वरिष्ठ उप-अध्यक्ष ते मुख्य प्रवक्ता रविन्दर शर्मा होरें आखेआ ऐ जे विधानसभाप च 5एं मिनबरे गी नामांकित करने दा अधिकार उस पार्टी गी होना लोडचदा जेह्ड़ी नमीं सरकार बनियै सामने आवै।